

anwürffen zu oberst zůsamen klammert / zu vnderst über einander geschrenckt / auffgericht / derē jede vnderer heupter werdē in die schwelle jetlicher pfulbeumē eingeschlossen. Schüe seindt fünff werckschüh lāg / vñ anderthalbē werckschüh breit / einen werckschüh dick. Ein jetliche seull aber wirt mit dem schüe zůsamen gfüget / mit dem bandt welchs ober haupt in die seulen geschlossen wirt / dz vnder aber in die schüe. Ein solcher pfulbaum aber ist vier werckschüh lang / einen werckschüh dick vnd breit / mit welcher ggestalt wirt ein vmbblauß im gepell / welches mittel linien / bey fünffzig werckschüh lang ist : in der mitte dessen vmbblaußs im gepell / wirt ein tieffer kessell bey zehen werckschüh graben / vnd mit einem stößell dick gmacht / oder das es vest gnüg seye / wirt es mit den hölzern durch welche stempffell ghondt an einander gsetzt / vñ befestiget / dan mit deren zůsammen fügung wirt die erdt mit kesseln zůsammen gehalten / das sie nicht mag herab fallen. Zu vnderst im kessell wirt ein pfulbaum gelegt / drey werckschüh lang oder vier / anderthalben werckschüh dick vnd breit / das aber diß vn beweglich bleybe / ist es im pfulbaum an einander gsetzt / geschlossen. In seiner mitte ist ein eisernes gestalts pfennlin / in welchem ein eiserner zapff der spillen vñghet. Zůgleicher weiß der pfulbaum der zu oberst vnderm anwurff / in zweien seullen ist verschlossen / hatt ein eiserns pfennlin / in welchem der ander eiserner zapff der spillen vmbgetriben wirt / dan ein jede bergt spillen / wie ich jedes ein malen / so es sich leiden mag / sagenn will / hatt zwen eiserner zapffen / wie negell / im mittenn der heuptern / wie ein ring ront / seindt eingeschlagen / deren teill / so in das haupt der spillen gehefftet wirt / ist so breit als der kopff / vñnd eins quār fingers dick / das aber heraus ghert / ist ront / vñnd einer spannen dick / oder noch dicker / so es die noth erfordert : die heupter einer jeden bergt spillen / werden mit eisernen ringen vmbgwunden / vñnd gebundē / das sie die zapffen dester vester halten mögendt : die spillen aber / des gezeugs / die heupter außgenommen / ist gfiert / vñnd vierzig werckschüh lang / andert halbē werckschüh dick vñnd breit / in welchen spillen formē / die da seindt drunder / ob dem haupt werden vier steiffen darauff die arme ruhen / mit klammern in einander geschlossen / deren oberē heupter haltendt zwen arm / so die quār überghendt / vñnd in einander geschlossen. Steiffe aber darauff die arme ruhen / seindt achtzehen werckschüh lang / dreyer spannen dick / fünff breit. Aber arm / so in die quār überghendt / vnd in einand geschlossen / seindt also an die spille gehefftet / vñnd mit hölzernen negeln zůsamen gfügt / das sie nicht von einander mögendt / dise aber seindt vier vñnd zwenzig werckschüh lang : darnach ist ein korb / auß dreyen korbscharben / vnder welchem die mittlere vorn der obersten gleich als von der vndersten sibē werckschüh ist / denen seindt vier speiche / welche gleich so viel donnhölzer die schlins hinauff ghendt / haltendt deren vnderere kopff / vmb die spillen / die mit d anwürffe zůsamen gfügt werden. Der ander kopff einer jeden speichen ist in die spillen / der ander in die felgen geschlossen. An die felgen der mittelste korbscheibenn / gehörendt allenthalben spindlen / zůgleich an die felgen der mittelsten / zu den felgen der obersten / welchem spindlen zwey seill ein gewicklet werden / das ein zwüschen der vndersten vnd mittelsten korbscheiben / das ander zwüschen der mittelsten vnd obersten / diß gebeuw wie ein kegell ggestalt auffgericht / außgenommen das gfiertre teill / welchs gegen dem schacht sehet / welchs gar mit schindlen bedeckt wirt. Als dan seindt rigell zweyfacher ordnung / auff beiden seittenn den seulen eingeschlossen / beide achtzehen werckschüh lāg / aber die seule seindt eines werckschüchs dick vnd breit / die rigell dreyer spanne. Es seindt aber sechzehen seule / acht rigell / über welche zwey stegē / darauff die gepell seulen / eins werckschüchs breit / glegt werdenn / dreyer spannen dick / in die breite eins halben werckschüchs außgehauwen / bey fünff quār finger hoch : die eine wirt glegt auff die oberē rigeln / die andere / auff die vnderen / seindt beide so lang / das sie gar nach vorn der scheiben des gepells

bis